

# 3 Joun

## Olo Iyoswo Nom'ne Tifinjo loso Joun Afahwo Mti'mokumentisofoho.

### Olo Hungkuno simo'mjofoho.

Jisas ahwomomne'no nto simentiso sohonta soswo *sikisiti*'nji (60) *sikisiti-sikis*'nji (66) nto uyakolo'mentiso ajwo sopolikeno olo iyoswo ne'no tifinjo loso Joun afahwo mti'mokumentisofoho. Olo iyoswo hiloso Ngkaiyasimne'no mti'mokumentisofoho. Ngkaiyos sohwo Jouniye a'amu hweho. Kako oso hwaho engo Esiya sopo humunyo hweho. Joun oso ango hopo sopo ne'no a'amu syoho'njo sohwa uhwajimonto imentisoso Ntiyoutilefes kako oso a'amu yofe hwe engo'njo umo'nimonto oso a'amu syoho'njo sohwo monje esyahoningki Joun kako hwe anga'no kakoe yofe Ntemitiliyos osohumo yofe ho'nomanto uhwajimentisofoho. Olo iyoswo loso Jouniye a'amu Ngkaiyos sohwo Ntemitiliyos syoho yahoningkuhwosi hofiyo umokosyohumane'ento olo iyoswo loso'nji mti'mokumentisofoho. Oso'no nakwo olo hungkuno homo lomo atofu lihwasi tifi uningkohwano.

---

<sup>1</sup>Ngko Anituye mehomi somo mokosyohumawo'ningkohe sohwo'ni ngko nje ningkwahwo Ngkaiyos sohwo hne'no olo iyoswo loso kumti'mokiyalokweno. Ngko kikimo nehopi simeho kijopalokweno.

<sup>2</sup>Nje a'amu sohwo, kiko yo'mayo syoho wopingo yontaningkini Anitu kufo'malokunjo so'nji kiko wopingo humahnno so'no ngko Mpohumo jomo ulalokweno. Jije huyo'mango so'no ngko huno niyohoho wopingo humaho. I jije huyo'mango wopingo humaso hopaso jije a'apaho hi'nji wopingo osenohini humahnno so'no Mpohumo jomo ulalokweno. <sup>3</sup>A'amu fehohnjo Anitumo simeho hi'ntnnono uyiwo'ningkohofoso jije angopo nta'ni ni'mantifi ntimalofi, Ngkaiyos sohwo kako Anituye hungkuno ne somo aho yokumpohn'nyo kemokosyohumanto hofiyo'no iningkowalofoho. Ose ntahoningkofi ngko simonyo imalefoho. <sup>4</sup>Nje mehomi hofiko Anituye

hungkuno ne somo iningkowalokwofo so'no upa'nonji oso'no ngko simonyo iwo'ningkohe hwo'nyoho. Oso simonyo iyo hiso nom'ne yo'mayo so'no simonyo iwo'ningkohoho somo yakolo'nnyofoho.

**Ngkaiyos syoho wopingo imentisofoho.**

<sup>5</sup>U nje a'amu sohwo, kiko a'amu Anituye hungkuno liku'mofiwo'ningkohoho sohwo ufo'mawo'ningkinoso oso wonyoangkafofoho. Jije a'amu'nohini'maho. O'o, a'amu kengo mta'ango sohwanjoho. <sup>6</sup>Oso a'amu huhwo sohwa hofiko olopo ni'mantifi kiko hofikimo wopingo uloho'mahno so'no nakwo Anitune'no uhu'mokontaningkuhwoni nalimalofofoho. Kiko a'amu Anituye hungkuno liku'mofo sohwo jije angopo nta'ni hano hofiyono hmfihwajo. Ose yahoningkiji Anituye simeho wopingo umo'nimontonoho. <sup>7</sup>Hofiko oso syoho yalokwofoso Kilaisiye yofe ho'nomayo'ne yalokwofo. A'amu Anitumo simeho hi'ntnnono muyo'njo sohwa mta'ni hofiko hamniyoho yo'mayoso momaso'njo yalokwofo. <sup>8</sup>Nakwo Anituye a'amu ne hn'ni nakwo oso a'amu huhwo sohwo ufo'mano. Ose ihwasi oso hungkuno syoho ne'njo so'no nakwo syoho afa'no womojoku'nantanoho.

**Ntiyoutilefes kako yahino wonyo imentisofoho.**

<sup>9</sup>Ngko oso a'amu Ntiyoutilefesi'nji Anitumne'no uhu'mokuwo'ningkohoho somne'no ngko iyoswo nom'neso nto mti'mokumalefoho. Ntiyoutilefes sohwo kako a'amu hiso hofiko nakwoe hwe engo hwasoho ulantife'no yalokunjo so'no kako nje hungkunomo haloho manipewo'ningkiso hweho. O'o, kako nje hungkunomo hwotoho nifewo'ningkiso hweho. <sup>10</sup>Oseso ngko sekumo se'ma'me'manji ngko yo'mayo kako iwo'ningkiso so'no waselimonnoho. Kako nakune'no yo'mayo hungkuno wonyo lalofoho. Kako hwasyo hungkuno lalofoho. Oso'nohini'maho. O'o, kako a'amu Anituye hungkuno liku'mofo sohwo kakoe angomo mipemotasyiwo'ningkiso hweho. I a'amu nom'neso hofiko oso a'amu Anituye hungkuno liku'mofo somo nje angomo upemokosyowo'mo loso sohomo Ntayoutilefis sohwo kako hofikoe honingkano pijumofiwo'ningkiso hweho. Oseso kako oso a'amu homo somo hofiko Anitumne'no uhu'mokiyo somta'ni wae weeo'mto yalofoho.

**Ntemitiliyos sohwo kako yahino wopingo iwo'ningkiso hweho.**

<sup>11</sup>U nje a'amu sohwo, kiko yahino wonyo somo tifi iningkahutoho. O'o, honingkano wopingo somnohini tifi finingkayo. A'amu kako yahino wopingo'njo sohwo kako Anituye a'amu hweho. A'amu kako yahino wonyo iwo'ningkiso oso hwo kako Anitune'no huno mosyafisiyo hweho.

<sup>12</sup>A'amu hopi'nonohino sohwa hofiko Ntemitiliyosiye yofe ho'nomalokwofo. Nakwo Ntemitiliyos osohomo uhwonontani nakwo

Kilaisiye yahino ne somo uhwonalokuhwono. Oso'no ngko huhwo'ni kakoe yofeso ho'nomalokweno. Oso'no kiko huno kiyohoho, Nje hungkunoso ne'njofoho.

**Hungkuno ae'uyofoho.**

<sup>13</sup>Oseso ngko hungkuno sawemo waselimonji ko yoheso oso'no ngko iyoswomo mamti'mokumnehono. <sup>14</sup>We'enepe ngko noku'mahm'me'no nekwo hungkuno wohnnantaeho.

<sup>15</sup>Jije simehoso pompeno ufisyakumofono. Jije a'amu olopo humalofo sohwa hofiko nje hwomuhwe kilalokwofo. Nje a'amu kiko'nji humalofo sohwanne'no nje a'amuyo ulalokweno. Kiko hofikimo njiyo. Osohopeho. Ngko Joun'ni hungkuno loso mti'mokohono.